

Wadah وادعہ

APRIL - JUN 2019 | REJAB - SYAWAL 1440

BILANGAN 67 | JILID 22



Tema dan Konsep Majlis Sambutan
Hari Raya Aidilfitri
Menekankan Kepentingan
Perkembangan Sektor Pertanian

Dasar Penubuhan

Yayasan Sultan Haji Hassanal Bolkiah

Menjadi Wadah Amal Jariah Kebawah Duli Yang Maha Mulia
Paduka Seri Baginda Sultan Haji Hassanal Bolkiah Mu'izzaddin Waddaulah
dan Ahli Keluarga Baginda.

Sebagai tanda pemedulian dan kasih Kebawah Duli Yang Maha Mulia
Paduka Seri Baginda Sultan Haji Hassanal Bolkiah Mu'izzaddin Waddaulah
kepada rakyat Baginda yang sentiasa taat setia kepada Baginda
dan Kerajaan Baginda.

Menjadi lambang pembentukan dan perpaduan masyarakat dan Negara Brunei Darussalam
yang sejahtera dan makmur serta keharmonian umat manusia antarabangsa mengikut
keadaan dan kesesuaian yang diredhai oleh
Allah Subhanahu wa Ta'ala.






Hasrat Titah

“ Dalam era digital sekarang ini, kita perlu peka dengan kemajuan teknologi yang pesat yang dibawa oleh Revolusi Industri Keempat. Sebagai sebuah negara yang mempunyai wawasan, kita tidak boleh ketinggalan dalam meneroka ekonomi digital. ”

**Petikan Titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah Ibni Al-Marhum Sultan Haji Omar 'Ali Saifuddien Sa'adul Khairi Waddien,
Sultan dan Yang Di-Pertuan Negara Brunei Darussalam
Sempena Sambutan Hari Kebangsaan Negara Brunei Darussalam
Kali Ke-35 bagi Tahun 2019**



Kandungan

Editorial

- 2** Tolong Menolong Pemangkin Kesejahteraan

Berita Perdana

- 4** Tema dan Konsep Majlis Sambutan Hari Raya Aidilfitri Menekankan Kepentingan Perkembangan Sektor Pertanian



Berita Utama

- 10** Pelancaran Pengagihan Buah Kurma Kurnia Peribadi Kebawah Duli Yang Maha Mulia Sempena Bulan Ramadan

Berita

- 13** Majlis Junjung Ziarah Sempena Hari Raya Aidilfitri



- 15** Majlis Khatam Al-Quran sempena Bulan Ramadan

- 17** Majlis Tahlil di Kubah Makam Diraja Sempena Bulan Ramadan

- 18** Muzakarah bersama Penduduk Kampung Bolkiah

- 19** Biasiswa Sultan's Scholar
- Motivasi Pelajar Raih Kecemerlangan



Sumbangan Amal

- 21** Sumbangan kepada Tabung Kemanusiaan bagi Pelarian Palestin

- 22** Program Ihsan Yayasan sempena Bulan Ramadan

- 24** Sumbangan bagi Aktiviti Takmir Masjid Sepanjang Ramadan

- 25** Sumbangan Peralatan dan Keperluan Sekolah bagi Sesi Persekolahan Tahun 2019

- 27** Sumbangan Keperluan Asasi kepada Mangsa Kebakaran



Ihsan

- 28** Membantu Golongan yang Memerlukan Bantuan melalui Pendekatan Perusahaan Sosial
- 29** Bengkel Keusahawanan '*Business Plan Series*'
- 30** Bengkel Penulisan '*Personal Statement*'

Kegiatan Sukarelawan

- 31** Aktiviti Kemasyarakatan Membersihkan Rumah Mangsa Kebakaran

Aktiviti DANA

- 32** DANA Hargai Sokongan dan Sumbangan Ikhlas Para Dermawan

Aktiviti BKP

- 36** Perlawanan Persahabatan *Paintball*

Kegiatan Sekolah

- 37** Program Amal Ramadan 2019
- 38** K-Dream Night, Malam Budaya Korea
- 39** Lawatan ke UBD Spectacle 2019
- 40** Minggu Bahasa Inggeris
- 41** Minggu Aktiviti Sains
- 42** Bengkel Motivasi Pelajar PSR
- 43** Acara Sukan Kids Athletic
- 44** Bulan Akademik MIB dan IRK
- 45** Majlis Sambutan Israk Mikraj
- 46** Sambutan Hari Raya Aidilfitri TASKA
- 47** Acara Sukan Ria FUNTASKATIC TASKA 2019



Atur Huruf, Reka Bentuk dan Pencetak
Brunei Press Commercial Printing Services

Penerbit

Yayasan Sultan Haji Hassanal Bolkiah
Negara Brunei Darussalam

Pengerusi Lembaga Pengarah

Yang Berhormat Pehin Datu Lailaraja Mejah
Jeneral (B) Dato Paduka Seri Haji Awang
Halbi bin Haji Mohd. Yussof

Pengarah Urusan

Yang Mulia Dato Paduka Eddie bin
Dato Paduka Haji Sunny
(sehingga 26 Jun 2019)

Penolong Pengarah Urusan

Yang Mulia Awang Haji Musthapa bin
Haji Matahir
Yang Mulia Awang Haji Puasa bin Haji
Jumat
Yang Mulia Dayang Hajah Donnaliza
binti Abdullah Puasa

Ketua Editor

Yang Mulia Dayangku Azami binti Pengiran Haji
Ahmad

Editor Tamu

Yang Mulia Dayang Zakiyah binti Abdullah
Yang Mulia Awang Haji Ali Asnan bin Haji Pungut

Editor

Yang Mulia Awang Kasyfil Aziz bin Haji Jumat
Yang Mulia Pengiran Shah Rizal bin Pengiran Haji
Mohd. Said
Yang Mulia Pengiran Siti Norkarimah binti Pengiran
Anak Haji Hashim

Tolong Menolong Pemangkin Kesejahteraan

Tolong menolong merupakan sikap yang mulia dan menjadi suatu keperluan dalam kehidupan manusia. Setiap manusia mempunyai kemampuan yang berbeza-beza. Kelebihan sendiri dalam suatu perkara dapat memberi manfaat bukan sahaja kepada diri sendiri bahkan kepada orang lain yang memerlukan. Begitu juga sebaliknya, kelebihan orang lain akan memberi manfaat dan kebaikan kepada kita. Satu konsep penting dalam melahirkan hubungan yang sejahtera dan harmoni ialah saling tolong-menolong bagi melengkapi keperluan antara satu dengan yang lain.

Ugama Islam menuntut manusia untuk saling tolong-menolong dalam perkara yang memberi kebaikan. Firman Allah Subhanahu wa'tala dalam surah al-Maidah ayat 2 bermaksud "...*Dan tolong-menolonglah kamu dalam kebajikan dan ketaqwaan dan janganlah tolong-menolong dalam dosa dan permusuhan (melanggar hukum Allah)...*". Konsep tolong-menolong dalam Islam mempunyai had dan garis panduan yang setentunya mendorong ke arah kesejahteraan.

Amalan tolong menolong memupuk nilai murni dalam kehidupan, mengeratkan silaturrahim, memupuk rasa kasih sayang dan tanggungjawab, mengikis sifat mementingkan diri dan mewujudkan perpaduan dan keharmonian masyarakat.

Konsep Majlis Sambutan Hari Raya Aidilfitri anjuran Yayasan Sultan Haji Hassanal Bolkiah pada tahun ini juga berkaitan dengan amalan tolong menolong. Konsep mempertemukan para pengeluar hasil pertanian (petani, penternak, nelayan dan pengusaha) dari pelbagai komoditi seperti tanaman, agrimakanan, ternakan, perikanan dan perhutanan dengan para peniaga, para pengeksport dan pengeluar yang dapat membantu memasarkan hasil pertanian tempatan adalah bagi memudahkan penawaran pasaran produk yang hasil pertanian tempatan. Kedua-dua golongan tersebut berpotensi untuk saling bantu membantu di antara satu dengan yang lain bagi memperkembangkan dan meluaskan pasaran produk pertanian tempatan bukan sekadar pasaran dalam negeri malah akses pasaran ke luar negara.

Menjayakan pengagihan buah kurma kurnia peribadi Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam juga memerlukan kerjasama secara kolektif dan sikap tolong menolong antara semua pihak yang terlibat. Bak kata pepatah melayu "berat sama dipikul, ringan sama dijinjing", sesuatu tugas dapat dilaksanakan dengan mudah dan berkesan serta menjimatkan masa dan tenaga.

Amalan tolong menolong memang telah wujud dalam masyarakat di negara ini khususnya dalam memberikan pemelulian terhadap masyarakat yang memerlukan bantuan. Amalan baik seperti ini perlu diterus dan dikembangkan agar menjadi budaya. Budaya hidup yang baik mencerminkan masyarakat yang makmur dan sejahtera. ●

**Dayangku Azami binti
Pengiran Haji Ahmad**
Ketua Editor

Helping Each other - A catalyst for Prosperity

Helping each other is truly a noble virtue, an essential prerequisite to peaceful co-existence. Each individual possesses differing abilities and personal strength. Positive personal strength brings forth positive benefits to self and to others. Similarly, others will reciprocate by virtue of their strength and propensity to care. Paramount in building a prosperous and harmonious co-existence is the act of helping each other beyond self and family.

One of the central principle of Islam is helping each other in goodness and piety. The Quran 05:02 (Surah al-Ma'idah) "Help each other in righteousness and piety, but do not help one another in sin and transgression." The Quran clearly defines the areas where we should not help each other in, "but do not help one another in sin and transgression", this sets the parameters for manifestations of true compassions which ultimately engenders prosperity.

The practice of helping each other in societal context thus reinforces relationship, nurtures love and sense of responsibility, curtails selfishness and creates unity and harmony.

The theme of Yayasan's Hari Raya Aidilfitri celebration this year embraces this concept of helping each other. The bringing together of producers (farmers, livestock breeders, fishermen and entrepreneurs of varied commodities ranging from crops and vegetables, agri-food, fishery and forestry) with the variety of enterprises including retailers, exporters and manufacturers allows for a more informed entrepreneurial community. The local farmers and those in the marketing and retailing business are gathered in the Majlis Hari Raya Aidil Fitri in the hope of enhancing transactions between them, helping each other in promoting and expanding local enterprises within and beyond boundaries.

The acts of helping each other, evidenced in the successful distribution of Kurma - the personal gift of His Majesty, Kebawah Duli Yang Maha Mulia Paduka Seri Baginda Sultan and Yang DiPertuan Negara Brunei Darussalam. It was a manifestation of collective efforts based on the concept of helping each other. The malay proverb of ""berat sama dipikul, ringan sama dijinjing" which literally translates as a heavy load should be borne together as well as a light load means trouble shared is a trouble halved clearly allows for tasks to be done in a most efficient manner, saving time and effort.

The practice of helping each other long in existence in the community particularly dominant in the caring for members of community in need. This noble practice of helping each other must persist as part of culture and way of life reflecting prosperous and harmonious society. ●

**Dayangku Azami binti
Pengiran Haji Ahmad**
Editor-in-Chief

Tema dan Konsep Majlis Sambutan Hari Raya Aidilfitri Menekankan Kepentingan Perkembangan Sektor Pertanian



Pada menjunjung aspirasi Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam untuk menggerakkan sektor pertanian sehingga menjadi penyumbang signifikan dalam ekonomi negara dan juga keselamatan makanan, Yayasan Sultan Haji Hassanal Bolkiah memilih tema "Sektor Pertanian: Survivability Bangsa dan Negara" bagi Majlis Sambutan Hari Raya Aidilfitri 1440 Hijrah / 2019 Masihi. Tema tersebut sejajar dan mendukung tema Majlis Ilmu 2018, iaitu sebagai sokongan Yayasan ke arah memenuhi pendekatan senegara atau *Whole of Nation Approach*.

Selaras dengan tema yang memberikan penekanan terhadap kepentingan perkembangan sektor pertanian, Yayasan mengetengahkan peserta-peserta yang terdiri daripada para pengusaha dan pengeluar hasil pertanian (petani, penternak dan nelayan); para peniaga dan pengusaha produk pertanian yang membeli hasil-hasil pertanian tempatan (termasuk pasar raya, restoran, hotel dan perkhidmatan katering); dan pengeluar atau pengeksport yang memasarkan dan memproses produk pertanian tempatan. Selain itu, para belia program pertanian seperti Projek Rintis, Projek Belia Berpadi dan Projek Peladang Muda, para pelajar institusi pengajian tinggi yang mengikuti pengajian dalam bidang pertanian dan beberapa agensi yang terlibat dalam

mendukung sektor pertanian turut diketengahkan sebagai peserta pada tahun ini.

Konsep Majlis Sambutan Hari Raya Aidilfitri 1440 Hijrah / 2019 Masihi adalah untuk mempertemukan para pengeluar hasil pertanian yang terdiri daripada petani, penternak, nelayan dan pengusaha daripada pelbagai komoditi (seperti tanaman, agrimakanan, ternakan, perikanan dan perhutanan) dengan para peniaga (termasuk perusahaan, pasar raya, restoran, hotel dan perkhidmatan katering) serta para pengeksport dan pengeluar yang dapat membantu memasarkan hasil pertanian tempatan melalui jalinan niaga (*business networking*) bagi memudahkan



penawaran pasaran produk yang dihasilkan. Konsep ini memfokus terhadap pemasaran atau akses kepada pasaran bagi memudahkan penawaran pasaran produk pertanian tempatan.

Kedua-dua golongan tersebut berpotensi untuk saling membantu antara satu sama lain bagi memperkembang dan meluaskan pasaran produk pertanian tempatan, bukan sekadar pasaran dalam negara malah akses pasaran ke luar negara. Jalinan ini bukan hanya dihasratkan dapat menyumbang kepada pertumbuhan keluaran sektor pertanian yang lebih pesat, malah berupaya menyumbang kepada pertumbuhan

Keluaran Dalam Negara Kasar (KDNK). Dalam masa yang sama dapat menjana peluang-peluang pekerjaan.

Majlis Sambutan Hari Raya Aidilfitri 1440 Hijrah / 2019 Masihi kali ke-16 anjuran Yayasan telah diadakan pada 22 Syawal 1440 bersamaan 27 Jun 2019, di Pusat Persidangan Antarabangsa, Berakas.

Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam berkenan berangkat bercemar duli ke majlis tersebut berserta Kerabat Diraja.

Ahli-ahli Kerabat Diraja yang turut berangkat sama ialah Duli Yang Teramat Mulia Paduka Seri Pengiran Muda Mahkota Pengiran Muda Haji Al-Muhtadee Billah ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Menteri Kanan di Jabatan Perdana Menteri; Duli Yang Teramat Mulia Paduka Seri Pengiran Muda 'Abdul Malik ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Pengurus Jemaah Tadbir Yayasan Sultan Haji Hassanal Bolkiah; Duli Yang Teramat Mulia Paduka Seri Pengiran Muda 'Abdul Mateen ibni Kebawah Duli Yang Maha Mulia Paduka Seri Baginda Sultan



Haji Hassanal Bolkiah Mu'izzaddin Waddaulah; Duli Yang Teramat Mulia Paduka Seri Pengiran Bendahara Seri Maharaja Permaisuru Pengiran Muda Haji Sufri Bolkiah ibni Al-Marhum Sultan Haji Omar 'Ali Saifuddien Sa'adul Khairi Waddien; Duli Yang Teramat Mulia Paduka Seri Pengiran Digadong Sahibul Mal Pengiran Muda Haji Jefri Bolkiah ibni Al-Marhum Sultan Haji Omar 'Ali Saifuddien Sa'adul Khairi Waddien; dan Yang Teramat Mulia Paduka Seri Pengiran Anak Puteri Hajah Masna ibni Al-Marhum Sultan Haji Omar 'Ali Saifuddien Sa'adul Khairi Waddien.

Acara kemuncak majlis ialah titah Kebawah Duli Yang Maha Mulia Paduka Seri Baginda Sultan Haji Hassanal

Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam. Selain menekankan tentang perkembangan sektor pertanian, Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam juga menekankan kepentingan penglibatan para belia dalam memajukan sektor pertanian.

"...Di samping terus meningkatkan sektor pertanian, produktiviti, penggunaan teknologi tinggi dan menyediakan ekosistem yang teratur, satu elemen penting yang mesti diberi perhatian juga

ialah sumber tenaga manusia. Maka ke arah ini, Beta menyeru para belia untuk tampil sebagai tenaga utama dalam industri pertanian negara. Kerajaan Beta telah dan sedang melaksanakan beberapa inisiatif untuk membantu pertumbuhan sektor ini. Contohnya, melalui Kementerian berkenaan, Beta telah memperkenankan satu inisiatif yang digelar Projek Rintis, yang merangkumi penawaran tapak secara rintis untuk percubaan. Projek ini memberi peluang kepada rakyat, terutama para belia dan penduduk untuk turut bergiat dalam aktiviti perladangan ataupun penternakan."

(Titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah



bersempena Majlis Sambutan Hari Raya Aidilfitri, Yayasan 22 Syawal 1440 / 27 Jun 2019)

Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam berserta ahli-ahli Kerabat Diraja turut berkenan menerima junjung ziarah dan beramah mesra daripada semua peserta yang hadir. Di samping memberi peluang kepada para peserta untuk beramah mesra dengan Raja yang sangat dikasihi, majlis tersebut juga setentunya memberi inspirasi dan perangsang kepada para

peserta dalam melaksanakan peranan mereka masing-masing.

Majlis juga diserikan dengan persembahan pentas daripada para pelajar Sekolah Yayasan, iaitu gabungan daripada kanak-kanak Taman Asuhan Kanak-Kanak (TASKA) Yayasan, murid-murid Sekolah Rendah Yayasan dan penuntut-penuntut Sekolah Menengah Yayasan.

Bersesuaian dengan tema dan konsep sambutan, pameran yang berkONSEPkan jalinan niaga (*business matching*) antara para pengusaha dan agensi pemasaran produk pertanian yang berjaya selaku peneraju dalam

penghasilan dan pemasaran produk pertanian dengan para pengusaha pertanian tempatan juga diadakan. Sebanyak enam kategori diketengahkan dalam pameran tersebut, iaitu kategori Kementerian Sumber-Sumber Utama dan Pelancongan, kategori agensi, kategori pasar raya, kategori perkhidmatan katering, kategori *contract farming* dan eksport, dan kategori *Government-Linked Company*. Keenam-enam kategori tersebut memainkan peranan masing-masing dalam pemasaran produk pertanian dan agrimakanan di negara ini. Pameran tersebut dibukakan kepada orang ramai dan jualan produk pertanian tempatan juga turut sama diadakan. ●







Pelancaran Pengagihan Buah Kurma Kurnia Peribadi Kebawah Duli Yang Maha Mulia Sempena Bulan Ramadan

Duli Yang Teramat Mulia Paduka Seri Pengiran Muda 'Abdul Malik ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Pengerusi Jemaah Tadbir Yayasan Sultan Haji Hassanal Bolkiah berkenan menyempurnakan Majlis Pelancaran Pengagihan Kurma Kurnia Peribadi Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam

sempena bulan Ramadan 1440 Hijrah / 2019 Masihi. Majlis tersebut diadakan pada 10 Syaaban 1440 bersamaan 16 April 2019 di Dewan Persidangan Utama, Pusat Persidangan Antarabangsa, Berakas.

Keberangkatan Duli Yang Teramat Mulia menyempurnakan majlis tersebut mencerminkan keprihatinan yang mendalam dan berterusan ke atas usaha Yayasan Sultan Haji Hassanal Bolkiah dalam menyempurnakan hajat Kebawah Duli Yang Maha Mulia Paduka Seri

Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam untuk mengurniakan amal sedekah secara khusus, iaitu kurnia peribadi berupa buah kurma sempena bulan Ramadan pada setiap tahun.

Dalam majlis tersebut, Duli Yang Teramat Mulia Paduka Seri Pengiran Muda 'Abdul Malik telah berkenan mengurniakan sabda dengan merakamkan penghargaan kepada semua pihak yang terlibat dalam melaksanakan pengagihan buah kurma kurnia peribadi Kebawah Duli Yang Maha Mulia.

"Apabila kita bercakap tentang bulan Ramadan di negara ini, ianya tidak boleh lari dengan amalan yang sering kita lakukan, iaitu dengan pengagihan Kurma Kurnia Peribadi Paduka Ayahanda melalui Yayasan Sultan Haji Hassanal Bolkiah. Oleh itu, saya ingin mengambil kesempatan ini untuk merakamkan terima kasih di atas komitmen dan usaha gigih yang selama ini telah ditunjukkan oleh para pemimpin akar umbi dan pihak-pihak yang berkenaan dalam merealisasikan hasrat Paduka Ayahanda untuk melihat Kurma Kurnia Peribadi Baginda dijadikan juadah berbuka puasa di negara ini. Sumbangan murni dalam berbakti kepada Raja di samping meraih keberkatan dan ganjaran Allah adalah amalan yang amat dituntut oleh Ugama Islam, lebih-lebih lagi ianya bersangkutan paut dengan persiapan kita menyambut bulan Ramadan yang penuh dengan ganjaran dan pengampunan Allah subhanahu wa ta'alaa."

(Sabda Duli Yang Teramat Mulia Paduka Seri Pengiran Muda 'Abdul Malik, 10 Syaaban 1440 / 16 April 2019)

Di Majlis Pelancaran tersebut, Duli Yang Teramat Mulia Paduka Seri Pengiran Muda 'Abdul Malik telah menyempurnakan



pengagihan buah kurma kurnia peribadi Kebawah Duli Yang Maha Mulia kepada Penghulu-penghulu Mukim dan Ketua-ketua Kampung di seluruh negara. Duli Yang Teramat Mulia juga turut menyempurnakan pengagihan buah kurma kurnia peribadi Kebawah Duli Yang Maha Mulia kepada Pemerintah-pemerintah Tentera serta Komandan-komandan Angkatan Bersenjata Diraja Brunei dan Pengarah-pengarah Formasi Pasukan Polis Diraja Brunei.

Dengan sempurnanya Majlis Pelancaran Pengagihan Buah Kurma Kurnia Peribadi Kebawah Duli Yang Maha Mulia tersebut, maka bermulalah pengagihan buah kurma kurnia peribadi Kebawah Duli Yang Maha Mulia kepada seluruh rakyat dan penduduk yang beragama Islam di Negara Brunei Darussalam. Semua Penghulu Mukim (yang memangku jawatan Ketua-ketua Kampung) dan Ketua-ketua Kampung seterusnya





mengagih-agihkan buah kurma kurnia peribadi tersebut kepada anak-anak buah kampung di bawah jagaan masing-masing. Pemerintah-pemerintah dan Komandan-komandan Angkatan Bersenjata Diraja Brunei serta Pengarah-pengarah Formasi dan Pegawai-pejawai Pemerintah Pasukan Polis Diraja Brunei pula mengagih-agihkan buah kurma peribadi Kebawah Duli Yang Maha Mulia kepada pegawai-pejawai dan kakitangan di bawah jabatan dan unit formasi masing-masing.

Pada Ramadan tahun 1440/2019, Yayasan telah membuat pembelian buah kurma jenis Safawi sejumlah 126 tan metrik untuk dibahagikan kepada seluruh

rakyat dan penduduk yang beragama Islam di seluruh negara, tanpa mengira had umur dan taraf kerakyatan. Setiap seorang menerima satu kotak kecil yang mengandungi 300 gram buah kurma.

Bagi memastikan pembahagian buah kurma kurnia peribadi Kebawah Duli Yang Maha Mulia dikendalikan dengan sempurna, Yayasan telah menyediakan tatacara pembahagian dan borang khas yang diedarkan melalui Ketua-ketua Kampung di seluruh negara. Yayasan mengharapkan semua yang telah dipertanggungjawabkan bagi pengagihan buah kurma kurnia peribadi Kebawah Duli Yang Maha Mulia untuk mematuhi tatacara pembahagian seperti

yang ditetapkan Yayasan. Mereka yang terlibat juga disarankan untuk menggunakan kebijaksanaan masing-masing supaya buah kurma kurnia peribadi tersebut diterima dengan baik dan sempurna dan seterusnya dinikmati setiap orang yang beragama Islam di negara ini sebagai juadah berbuka puasa semasa bulan Ramadan. ●

Majlis Junjung Ziarah Sempena Hari Raya Aidilfitri



Majlis Mengadap dan Junjung Ziarah ke hadapan majlis Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam dan Kebawah Duli Yang Maha Mulia Paduka Seri Baginda Raja Isteri Pengiran Anak Hajah Saleha binti Al-Marhum Pengiran Pemancha Pengiran Anak Haji Mohamed Alam serta Kerabat Diraja yang lain sempena Hari Raya Aidilfitri merupakan peluang keemasan kepada orang ramai menzahirkan sembah ucapan "Selamat Hari Raya Aidilfitri" sempena meraikan hari kemenangan bersama raja yang dikasihi dalam suasana kemerahan Aidilfitri.

Seramai 200 orang warga kerja Yayasan Sultan Haji Hassanal Bolkiah menyertai Majlis Mengadap dan Junjung Ziarah di Istana Nurul Iman sempena Sambutan





Hari Raya Aidilfitri 1440 Hijrah / 2019 Masihi pada 4 Syawal 1440 bersamaan 9 Jun 2019.

Rombongan pegawai dan kakitangan lelaki diketuai Yang Berhormat Pehin Datu Lailaraja Mejari Jeneral (B) Dato Paduka Seri Haji Awang Halbi bin Haji Mohd Yussof, Menteri Pertahanan Kedua selaku Pengerusi Lembaga Pengarah Yayasan Sultan Haji Hassanal Bolkiah. Manakala, rombongan pegawai dan kakitangan perempuan pula diketuai oleh Yang Mulia Datin Hajah Kalshom bin Haji Suhaili, isteri Pengerusi Lembaga Pengarah Yayasan Sultan Haji Hassanal Bolkiah.

Acara ini merupakan aktiviti tahunan Yayasan Sultan Haji Hassanal Bolkiah pada setiap Hari Raya Aidilfitri. ●





Majlis Khatam Al-Quran sempena Bulan Ramadan

Kelebihan yang terdapat dalam bulan Ramadan menjadikan bulan ini sangat istimewa. Banyak amalan yang disunahkan oleh Nabi Muhammad sallallahu 'alaihi wasallam untuk dilaksanakan sepanjang bulan Ramadan bagi memperolehi ganjaran pahala yang berlipat ganda. Tadarus dan Khatam Al-Quran adalah antara amalan yang istimewa sepanjang bulan Ramadan.

Khatam Al-Quran merupakan salah satu aktiviti keagamaan yang dianjurkan Yayasan Sultan Haji Hassanal Bolkiah pada setiap bulan Ramadan. Seramai 30 orang pegawai dan kakitangan Yayasan telah menyertai pembacaan bacaan 30 juzuk Al Quran sebagai persediaan bagi Majlis Khatam Al-Quran sempena bulan Ramadan 1440 Hijrah / 2019 Masihi.



Majlis Khatam Al-Quran sempena bulan Ramadan 1440 Hijrah / 2019 Masihi telah diadakan pada 21 Ramadan 1440 bersamaan 27 Mei 2019. Duli Yang Teramat Mulia Paduka Seri Pengiran Muda 'Abdul Malik ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Pengerusi Jemaah Tadbir Yayasan Sultan Haji Hassanal Bolkiah berkenan berangkat ke majlis tersebut. Majlis diadakan di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan.

Majlis dimulakan dengan bacaan takhtim Al-Quran oleh 30 orang pegawai dan kakitangan Yayasan yang dipimpin Yang Mulia Awang Muhammad Syazwanshah bin Razali, Guru Sekolah Ugama Yayasan Sultan Haji Hassanal Bolkiah.

Majlis diteruskan dengan bacaan Doa Khatam dan Doa Selamat oleh Yang Dimuliakan Pehin Orang Kaya Paduka Setia Raja Dato Paduka Seri Setia Haji Awang Suhaili bin Haji Mohiddin, Hakim Mahkamah Rayuan Syariah. Acara majlis

diselanjurkan dengan berbuka puasa dan sembahyang fardhu Maghrib berjemaah.

Majlis tersebut turut dihadiri Ahli-ahli Jemaah Tadbir Yayasan; Ahli-ahli Lembaga Pengarah Yayasan; Ahli-ahli Lembaga Pemegang Amanah Dana Pengiran Muda Mahkota Al-Muhtadee Billah untuk Anak-Anak Yatim; pegawai-pegawai dan kakitangan Yayasan; serta guru-guru Sekolah Yayasan Sultan Haji Hassanal Bolkiah. ●





Majlis Tahlil di Kubah Makam Diraja Sempena Bulan Ramadan

Pada setiap bulan Ramadan, Yayasan Sultan Haji Hassanal Bolkiah menganjurkan Majlis Tahlil di Kubah Makam Diraja khusus bagi Al-Marhum Sultan Haji Omar 'Ali Saifuddien Sa'adul

Khairi Waddien ibni Al-Marhum Sultan Muhammad Jamalul Alam dan Al-Marhumah Duli Raja Isteri Pengiran Anak Damit binti Pengiran Bendahara Pengiran Anak Abdul Rahman. Majlis diadakan

pada 9 Ramadan 1440 bersamaan 15 Mei 2019 di Kubah Makam Diraja, Jalan Tutong, Negara Brunei Darussalam.

Duli Yang Teramat Mulia Paduka Seri Pengiran Muda 'Abdul Malik ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Pengurus Jemaah Tadbir Yayasan Sultan Haji Hassanal Bolkiah berkenan berangkat ke majlis tersebut.

Acara dimulakan dengan bacaan Yasin dan Tahlil yang diketuai Yang Berhormat Pehin Orang Kaya Paduka Seri Utama Dato Paduka Seri Setia Haji Awang Salim bin Haji Besar, Ketua Hakim Syar'ie, Mahkamah Syariah.

Turut hadir dalam majlis tersebut ialah Ahli-ahli Jemaah Tadbir Yayasan Sultan Haji Hassanal Bolkiah; Pengurus dan Ahli-ahli Lembaga Pengarah Yayasan Sultan Haji Hassanal Bolkiah; pegawai-pegawai dan kakitangan Yayasan Sultan Haji Hassanal Bolkiah; guru-guru Sekolah Yayasan Sultan Haji Hassanal Bolkiah serta penduduk-penduduk Rancangan Perumahan Kampung Bolkiah 'A' dan Kampung Bolkiah 'B'. ●





Muzakarah bersama Penduduk Kampung Bolkiah

Skim Perumahan Yayasan Sultan Haji Hassanal Bolkiah Kampung Bolkiah 'A' dan Kampung Bolkiah 'B' merupakan salah satu skim perumahan Yayasan Sultan Haji Hassanal Bolkiah yang khusus bagi menempatkan penduduk Kampung Ayer yang terlibat dalam kebakaran besar pada tahun 1993. Kebajikan dan kesejahteraan penduduk di kampung tersebut sentiasa diberi perhatian oleh Yayasan.

Yayasan menganjurkan sesi muzakarah bersama penduduk Kampung Bolkiah 'A' dan Kampung Bolkiah 'B' pada 29 Rejab 1440 bersamaan 5 April 2019 di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan. Sesi muzakarah dipengerusikan Yang Mulia Dato Paduka Eddie bin Dato Paduka Haji Sunny Pengarah Urusan Yayasan Sultan Haji Hassanal Bolkiah.

Sesi muzakarah dihadiri Ahli-ahli Majlis Perundingan Kampung bagi kedua-dua

Kampung Bolkiah 'A' dan Kampung Bolkiah 'B' serta ahli-ahli jawatankuasa takmir Masjid Yayasan Sultan Haji Hassanal Bolkiah.

Perbincangan tertumpu kepada hal-hal mengenai pelaksanaan kerja-kerja pembisian kampung dan usaha-usaha bagi meningkatkan kegiatan ekonomi dan kebajikan penduduk kampung. Wakil-wakil Kampung Bolkiah 'A' dan Kampung Bolkiah 'B' mengambil peluang mengongsikan beberapa kesulitan yang mereka hadapi, di samping memberi pandangan untuk mempertingkatkan hal ehwal kesejahteraan kampung. Antara cadangan yang diusulkan adalah untuk menujuhkan Pengawasan Kejiranan Kampung. Penerangan ringkas mengenai penubuhan Pengawasan Kejiranan Kampung disampaikan Yang Mulia Inspektor Hamdan bin Mantul, Pegawai Pengusa Balai Polis, Kampung Ayer.

Perumahan Yayasan Sultan Haji Hassanal Bolkiah Kampung Bolkiah 'A'

dan Kampung Bolkiah 'B' mengandungi sejumlah 476 buah rumah yang menempatkan seramai 2,956 orang penduduk. Bagi memeduli keselesaan dan kesejahteraan penduduk kampung, beberapa kemudahan telah disediakan seperti sebuah masjid, iaitu Masjid Yayasan Sultan Haji Hassanal Bolkiah; sebuah Pos Polis yang terletak di Kampung Bolkiah 'A'; sebuah klinik kesihatan; sebuah sekolah agama sementara yang terletak di Kampung Bolkiah 'B'; sebuah jambatan utama yang menghubungkan Kampung Bolkiah 'A' dan Kampung Bolkiah 'B'; dan cawangan pejabat Yayasan di kedua-dua buah kampung.

Setiap kampung juga dipimpin seorang ketua kampung. Ketua kampung Bolkiah 'A' ialah Yang Mulia Awang Shahminan bin Haji Matzin, manakala Ketua Kampung Bolkiah 'B' ialah Yang Mulia Awang Shamsuddin bin Haji Maidin. ●



Biasiswa Sultan's Scholar - Motivasi Pelajar Raih Kecemerlangan

Yayasan Sultan Haji Hassanal Bolkiah (Yayasan) menerima undangan daripada Pusat Tingkatan Enam, Sengkurong bagi menyertai Pesta Kerjaya dan Pengajian Tinggi bagi Program "Explore 2019 - Your Future Beckons". Acara tersebut diadakan pada 7 Syaaban 1440 bersamaan 13 April 2019 di Dewan Serba Guna, Pusat Tingkatan Enam, Sengkurong.

Hadir selaku tetamu kehormat majlis seterusnya menyampaikan ucapan ialah Yang Mulia Dayang Hajah Donnaliza binti Abdullah Puasa, Penolong Pengarah Urusan Yayasan, selaku Penyelaras *Sultan's Scholars*. Dalam ucapan pembukaan rasmi pesta kerjaya berkenaan, beliau menyentuh kepentingan pelajar-pelajar untuk mengoptimumkan peluang kehadiran pelbagai agensi di bawah satu bumbung, meneroka peluang-peluang pekerjaan,

mendalami keperluan sesuatu kerjaya serta memadankan dengan minat, kecenderungan dan bidang pengajian. Pelajar-pelajar juga digesa untuk membuka minda dan siap siaga untuk bersaing di pasaran kerja terutama dalam keadaan peluang pekerjaan yang kian mengecil dan kompetitif.

Pesta Kerjaya dan Pengajian Tinggi bagi Program "Explore 2019 - Your Future Beckons" disertai oleh institusi-institusi pengajian tinggi kerajaan dan swasta, Majlis Pengiktirafan Kelulusan Negara Brunei Darussalam, jabatan-jabatan kerajaan dan syarikat-syarikat yang berkaitan dengan kerajaan (GLC) serta agensi-agensi beruniform.

Kesempatan ini dimanfaatkan Yayasan untuk memberi gakan Skim Biasiswa *Sultan's Scholar* termasuk maklumat



mengenai syarat dan kriteria, ekspektasi Yayasan, proses dan prosedur pemilihan serta keistimewaan biasiswa *Sultan's Scholar*. Selain memberikan maklumat mengenai keistimewaan biasiswa berkenaan, penganugerahan biasiswa tersebut juga diharapkan dapat memberikan motivasi kepada para pelajar untuk meraih kecemerlangan dalam pembelajaran mereka dan seterusnya menjadi pemimpin cemerlang yang dapat menyumbang kepada pembangunan sosial dan ekonomi negara serta menjadi generasi penerus yang akan membarisi tampuk kepimpinan bagi kepentingan agama, raja dan negara. ●





Sumbangan kepada Tabung Kemanusiaan bagi Pelarian Palestin

Atas dasar persaudaraan dan kemanusiaan serta keprihatinan dalam membantu meringankan beban penderitaan yang ditanggung pelarian Palestin, Yayasan Sultan Haji Hassanal Bolkiah telah menghulurkan sumbangan kewangan sebanyak BND50,000 kepada Tabung Kemanusiaan bagi Pelarian Palestin.

Tabung Kemanusiaan bagi Pelarian Palestin ditubuhkan Kementerian Hal Ehwal Ugama, Negara Brunei Darussalam dengan kerjasama *United Nations Relief and Works Agency for Palestine Refugees in the Near East* (UNRWA) bagi mengumpulkan sumbangan berbentuk kewangan daripada rakyat dan penduduk di Negara Brunei Darussalam

sepanjang bulan Ramadan tahun 1440 Hijrah. Sumbangan tersebut seterusnya diserahkan kepada UNRWA untuk disalurkan bagi membantu meringankan beban penderitaan yang ditanggung pelarian Palestin.

Sumbangan Yayasan telah disampaikan Yang Berhormat Dato Seri Setia Haji Awang Abdul Mokti bin Haji Mohd Daud, Menteri di Jabatan Perdana Menteri selaku Ahli Lembaga Pengarah Yayasan Sultan Haji Hassanal Bolkiah yang juga selaku Pengerusi Jawatankuasa Meneliti Bantuan Yayasan Sultan Haji Hassanal Bolkiah kepada Menteri Hal Ehwal Ugama, Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Othman.

Majlis Penyampaian sumbangan diadakan pada 29 Ramadan 1440 bersamaan 4 Jun 2019 di Bangunan Kementerian Hal Ehwal Ugama, Berakas. Hadir sama di majlis tersebut ialah Yang Mulia Dato Seri Setia Awang Haji Abdul Aziz bin Orang Kaya Maharaja Lela Haji Yussof, Setiausaha Tetap, Kementerian Hal Ehwal Ugama dan Yang Mulia Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah. ●





Program Ihsan Yayasan sempena Bulan Ramadan

Kebajikan dan kesejahteraan warga emas dan keluarga kurang berkemampuan sentiasa diberikan perhatian oleh Yayasan Sultan Haji Hassanal Bolkiah. Sempena bulan Ramadan yang penuh

keberkatan, Yayasan telah melaksanakan Program Ihsan Yayasan bagi membantu warga emas, ibu tunggal dan keluarga kurang berkemampuan dalam menyediakan keperluan keluarga pada

bulan Ramadan supaya mereka dapat menjalankan ibadah puasa dengan sempurna. Sumbangan yang dihulurkan melalui program ini juga diharatkan dapat memberikan keceriaan kepada mereka dalam menyambut Hari Raya Aidilfitri.

Sejumlah 183 buah keluarga kurang berkemampuan dari beberapa buah kampung di seluruh negara telah menerima sumbangan kewangan dan makanan melalui Program Ihsan Yayasan sempena bulan Ramadan tahun 1440 Hijrah. Sumbangan tersebut disampaikan secara berasingan mengikut daerah masing-masing.

Pada 28 Ramadan 1440 bersamaan 3 Jun 2019, sebanyak 90 buah keluarga yang terdiri daripada warga emas dan keluarga yang memerlukan bantuan di Daerah Tutong dan Belait menerima sumbangan kewangan dan makanan melalui





Program Ihsan Yayasan. Sumbangan kepada 41 buah keluarga di Daerah Tutong disampaikan Yang Berhormat Dato Seri Setia Ir. Awang Haji Suhami bin Haji Gafar, Menteri Pembangunan selaku Ahli Lembaga Pengarah Yayasan Sultan Haji Hassanal Bolkiah di Dewan Kediaman Rasmi, Pegawai Daerah Tutong. Manakala, sumbangan kepada 49 buah keluarga di Daerah Belait pula disampaikan oleh Yang Berhormat Dato Seri Setia Awang Haji Hamzah bin Haji Sulaiman, Menteri Pendidikan selaku Ahli Lembaga Pengarah Yayasan Sultan Haji Hassanal Bolkiah di Masjid Al-Mashor, Kampung Sungai Mau, Daerah Belait.

Sebanyak 93 buah keluarga yang terdiri daripada warga emas dan keluarga yang memerlukan bantuan dari Daerah Brunei dan Muara dan Temburong pula menerima sumbangan berbentuk kewangan dan makanan melalui Program Ihsan Yayasan pada 29 Ramadan 1440 bersamaan 4 Jun 2019. Sumbangan kepada 52 buah keluarga di Daerah

Brunei dan Muara disampaikan Yang Berhormat Pehin Datu Lailaraja Mejar Jeneral (B) Dato Paduka Seri Haji Awang Halbi bin Haji Mohd. Yussof, Menteri Pertahanan Kedua selaku Pengerusi Lembaga Pengarah Yayasan Sultan Haji Hassanal Bolkiah di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan.

Sumbangan kepada 41 buah keluarga di Daerah Temburong pula disampaikan Yang Mulia Dr. Dayang Nor Imtihan binti Haji Abdul Razak, Setiausaha Tetap di Kementerian Pembangunan selaku Ahli Lembaga Pengarah Yayasan Sultan Haji Hassanal Bolkiah di Dewan Belalong, Kompleks Dewan Kemasyarakatan, Pekan Bangar. ●



Sumbangan bagi Aktiviti Takmir Masjid Sepanjang Ramadan



Selaras dengan objektifnya dalam meningkatkan dan mengembangkan syiar agama Islam, Yayasan Sultan Haji Hassanal Bolkiah memberikan sumbangan kepada sebahagian masjid, surau dan balai ibadat di seluruh negara bagi menjalankan kegiatan takmir masjid, surau dan balai ibadat.

Sumbangan ini adalah antara unggahan yang dilaksanakan Yayasan pada menjelangnya bulan Ramadan setiap tahun. Pada bulan Ramadan tahun 1440 Hijrah, sebanyak 51 buah masjid, surau dan balai ibadat di seluruh negara menerima sumbangan berbentuk kewangan daripada Yayasan.

Majlis penyampaian sumbangan tersebut diadakan pada 19 Syaaban 1440 bersamaan 25 April 2019 di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan. Kesemua sumbangan tersebut disampaikan Yang Mulia Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah kepada imam dan pegawai-pegawai masjid berkenaan.

Imam dan pegawai-pegawai masjid yang mewakili masjid masing-masing menyatakan rasa bersyukur di atas sumbangan Yayasan pada setiap tahun. Sumbangan tersebut antara lain dapat

membantu mereka melaksanakan pelbagai kegiatan takmir masjid sepanjang bulan Ramadan dalam menggerakkan usaha meningkatkan fungsi masjid sebagai tempat ibadah dan dakwah, tempat penyebaran ilmu dan mengeratkan tali silaturahim sesama insan. ●

Sumbangan Peralatan dan Keperluan Sekolah bagi Sesi Persekolahan Tahun 2019



Sumbangan dalam bentuk peralatan dan keperluan persekolahan bertujuan bagi memotivasi para pelajar daripada golongan keluarga kurang berkemampuan untuk meneruskan

pengajian mereka dengan sempurna. Sumbangan juga diharatkan dapat membantu meringankan beban perbelanjaan keluarga kurang berkemampuan dalam menyediakan

keperluan persekolahan anak-anak mereka khususnya pada setiap menjelang penggal pertama persekolahan setiap tahun.

Bagi sesi persekolahan tahun 2019, Yayasan Sultan Haji Hassanal Bolkiah telah menyampaikan sumbangan berbentuk peralatan dan keperluan sekolah kepada seramai 1,172 orang pelajar kurang berkemampuan daripada 76 buah sekolah di seluruh negara.

Sumbangan adalah dalam bentuk kupon bagi pembelian peralatan dan keperluan sekolah. Setiap pelajar menerima kupon yang bernilai BND73 bagi pelajar sekolah rendah dan BND84 bagi pelajar sekolah menengah.

Sumbangan tersebut disampaikan Yang Mulia Awang Ajman bin Haji Meludin, Timbalan Setiausaha Tetap, Kementerian Hal Ehwal Dalam Negeri selaku Ahli



Wadahوادعہ • Sumbangan Amal

Jawatankuasa Meneliti Bantuan Yayasan Sultan Haji Hassanal Bolkiah kepada Ketua-ketua Kluster, Jabatan Sekolah-sekolah, Kementerian Pendidikan. Sumbangan tersebut seterusnya diserahkan kepada pelajar-pelajar yang telah dikenalpasti sekolah masing-masing.

Majlis penyampaian sumbangan telah diadakan pada 26 Rejab 1440 bersamaan 2 April 2019 di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan. Turut hadir di majlis tersebut ialah Yang Mulia Dato Paduka Awang Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah. ●



Sumbangan Keperluan Asasi kepada Mangsa Kebakaran



Selaras dengan dasar penubuhannya, Yayasan Sultan Haji Hassanal Bolkiah secara berterusan melaksanakan aktiviti kebajikan khususnya membantu golongan yang sangat memerlukan. Dalam kejadian kebakaran rumah, Yayasan menghulurkan bantuan

berbentuk barang asasi bagi menampung keperluan keluarga yang terlibat dengan segera.

Pada 6 Syaaban 1440 bersamaan 12 April 2019, Yayasan menyampaikan sumbangan makanan dan keperluan

asasi kepada dua buah keluarga yang terlibat dalam kejadian kebakaran rumah di Rancangan Perumahan Negara Kampung Panchor Mengkubau. Sumbangan tersebut disampaikan pada hari kejadian.

Sumbangan Yayasan disampaikan Yang Mulia Awang Haji Puasa bin Haji Jumat, Penolong Pengarah Urusan Yayasan Sultan Haji Hassanal Bolkiah kepada ketua keluarga mangsa kebakaran, iaitu Yang Mulia Dayang Norlela binti Haji Mejenis dan Yang Mulia Dayang Qahirah Khalidah binti Khalid.

Yayasan amat prihatin terhadap kesejahteraan dan keperluan keluarga yang ditimpa musibah. Sumbangan dihasratkan dapat membantu meringankan beban kesulitan keluarga dan membolehkan mereka meneruskan kehidupan harian dan persekolahan anak-anak mereka tidak terjejas. ●





Membantu Golongan yang Memerlukan Bantuan melalui Pendekatan Perusahaan Sosial

Yayasan Sultan Haji Hassanal Bolkiah mengambil inisiatif mengetengahkan pendekatan Perusahaan Sosial (*Social Enterprise*) untuk membantu golongan sasar meningkatkan mobiliti sosial melalui peningkatan kebolehupayaan menjana tahap sara diri. Inisiatif ini dihasratkan untuk memperkuuhkan sosioekonomi golongan terpinggir melalui penglibatan dalam aktiviti keusahawanan.

Perusahaan sosial ialah organisasi yang mengaplikasikan strategi perusahaan untuk memaksimum peningkatan dari segi kewangan, sosial dan persekitaran. Melalui perniagaan, dana dapat dihasilkan untuk membiayai usaha penyelesaian sesuatu masalah secara berlanjutan dan menyeluruh. Perniagaan yang dijalankan perlu memberi keuntungan, dan keuntungan tersebut akan digunakan untuk melaksanakan misi yang diusahakan.

Usahawan sosial merupakan individu yang mempunyai penyelesaian inovatif kepada masalah sosial yang sedang dihadapi masyarakat di sekeliling. Seorang usahawan sosial akan mengambil apa jua peluang dan kesempatan yang terbuka tanpa disedari orang lain untuk memperbaiki ekosistem masyarakat, mengilhamkan pendekatan baru dan juga memikirkan cara penyelesaian baru untuk memperbaiki lagi masyarakat sekelilingnya.


Salah satu usaha Yayasan dalam melaksanakan inisiatif tersebut adalah dengan memberikan sokongan kepada sebuah badan bukan kerajaan (*NGO*), iaitu BruneiStartUpWeekend bagi mengadakan bengkel perusahaan sosial bertema "*StartUp Weekend Social Enterprise*" bermula 26 hingga 28 April 2019 bertempat di Ruang Tingkat

2, Kompleks Yayasan Sultan Haji Hassanal Bolkiah, Bandar Seri Begawan. Penyertaan bengkel ini dibukakan kepada orang ramai.

Bengkel tersebut bertujuan untuk menangani pelbagai isu sosial melalui inovasi dan inisiatif berkesan. Dalam masa 54 jam, para peserta bengkel dibimbing beberapa orang mentor dan pakar bagi membuat penyelesaian yang strategik dan inovatif terhadap beberapa masalah berhubung dengan Matlamat Pembangunan Mampan (*Sustainable Development Goals - SDG*).

Bengkel dibimbing Ke Lin (Linka), pakar perunding dari Program Pembangunan Bangsa-bangsa Bersatu (*UNDP*) Pemerksaan Ekonomi Belia di Thailand. Sementara, mentor terdiri daripada Ahli-ahli Majlis Mesyuarat Negara, Yang Berhormat Dayang Nik Hafimi binti Abdul Haadi dan Yang Berhormat Dayang Khairunnisa binti Awang Haji Ash'ari; Yang Mulia Trish Lim dari *Woven*; Yang Mulia Agus Muslim dari *Nextacloud Technologies Sdn. Bhd.*; Yang Mulia Bob Samid dari *Pins & Needles*; Yang Mulia Dayangku Kemariah binti Pengiran Haji Duraman dari *Kunyit 7 Lodge*; Yang Mulia Pengiran Haji Ahmad Fadillah Akhbar dari *Projek Bina Ukhwah*; Yang Mulia Dayang Nazurah Salleh dari *Re/Act*; Yang Mulia Dayang Rasyidah Samah dari *Sutera Media* dan Yang Mulia Shinny Chia dari *The Collective*.

Yayasan berharap bengkel tersebut dapat melahirkan jalinan kerjasama padu dengan lebih ramai usahawan sosial yang sedia ada mahupun yang baru memulakan usaha serta orang ramai bagi mengembangkan ide mengenai perusahaan sosial dalam membantu masyarakat yang memerlukan. ●



Bengkel Keusahawanan '*Business Plan Series*'

Yayasan Sultan Haji Hassanal Bolkiah dengan kerjasama LiveWIRE Brunei menganjurkan bengkel keusahawanan, iaitu Bengkel Keusahawanan: '*Business Plan Series*' khusus bagi para pemohon bantuan modal perusahaan atau perniagaan di bawah Skim Pembiayaan Kebajikan (SPK).

Bengkel tersebut disertai seramai 13 orang peserta yang terdiri daripada pemohon bantuan modal perusahaan atau perniagaan Yayasan bagi *kohort* pertama tahun 2019. Bengkel berlangsung selama dua hari, iaitu pada 6 dan 7 Syaaban 1440 bersamaan 11 dan 12 April 2019 di Dewan Serba Guna, Tingkat 4, Kompleks Yayasan Sultan Haji Hassanal Bolkiah, Bandar Seri Begawan.

Bengkel keusahawanan: '*Business Plan Series*' merupakan fasa terakhir bagi pemohon-pemohon yang telah dikenalpasti sebelum mereka diserapkan ke dalam skim SPK Yayasan. Melalui skim tersebut, mereka akan diberikan bantuan modal perusahaan atau perniagaan yang bersesuaian bagi membolehkan mereka menjalankan dan memajukan usaha perniagaan mereka. Para peserta juga diwajibkan untuk menjalani beberapa siri latihan menjurus kepada kemahiran dan pengetahuan keusahawanan.

Sebelum menyertai bengkel ini, para peserta telah mengikuti Bengkel Keusahawanan: '*Bright Ideas*'. Kedua-dua bengkel '*Bright Ideas*' dan '*Business Plan Series*' adalah '*bespoke programme*' atau program direncana khas untuk kumpulan sasaran ini dan merupakan program wajib sebelum peserta dipertimbangkan

untuk menerima modal perusahaan atau perniagaan di bawah skim SPK Yayasan. Bengkel bertujuan untuk memastikan para penerima bantuan modal perusahaan atau perniagaan benar-benar mempunyai kemampuan dan pengetahuan dalam bidang perniagaan yang akan mereka ceburi.

Bengkel '*Business Plan Series*' ditutup dengan majlis penyampaian sijil penyertaan kepada para peserta yang telah disempurnakan Yang Mulia Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah. Majlis penyampaian sijil diadakan pada 7 Syaaban 1440 bersamaan 12 April 2019 di Dewan Serba Guna, Tingkat 4, Kompleks Yayasan Sultan Haji Hassanal Bolkiah, Bandar Seri Begawan. ●



Bengkel Penulisan '*Personal Statement*'

Biasiswa *Sultan's Scholar* Yayasan Sultan Haji Hassanal Bolkiah merupakan biasiswa berprestij yang dianugerahkan kepada warganegara Negara Brunei Darussalam untuk melanjutkan pengajian dalam pelbagai bidang bermula daripada tahap Ijazah Sarjana Muda sehingga ke tahap selanjutnya.

Antara keistimewaan bagi penerima biasiswa *Sultan's Scholar* Yayasan Sultan Haji Hassanal Bolkiah ialah meneruskan pengajian mereka di universiti-universiti terkemuka di seluruh dunia, iaitu 20 universiti teratas di dunia. Proses kemasukan ke universiti-universiti ternama ini melibatkan persaingan yang tinggi daripada pelajar-pelajar cemerlang dari seluruh dunia. Para pelajar yang berhasrat untuk memasuki universiti-universiti tersebut perlulah

meningkatkan kemahiran mereka dalam beberapa aspek dan juga menimba banyak pengalaman yang boleh menjadi kelebihan bagi diri mereka.

Menghasilkan '*Personal Statement*' merupakan salah satu aspek penting dalam permohonan untuk memasuki universiti ternama. '*Personal Statement*' yang berkesan perlu memenuhi beberapa kriteria.

Dalam hal ini, Yayasan Sultan Haji Hassanal Bolkiah menganjurkan Bengkel Penulisan '*Personal Statement*' khusus bagi para pelajar yang telah dikenalpasti dan berpotensi bagi mendapatkan biasiswa *Sultan's Scholar*. Bengkel tersebut adalah antara program sokongan bagi memberi khidmat bantu kepada pelajar, iaitu sebagai persediaan mereka

dalam menyediakan dokumen yang diperlukan universiti-universiti ternama. Bengkel dikendalikan Yang Mulia Awang Raymond George, Guru Kerjaya, Maktab Sains Paduka Seri Begawan Sultan.

Dua sesi bengkel diadakan di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan. Sesi pertama diadakan pada 4 Syaaban 1440 bersamaan 10 April 2019 yang disertai lapan orang pelajar dari International School Brunei dan tujuh orang pelajar dari Jerudong International School berserta guru kerjaya masing-masing. Manakala, sesi kedua diadakan pada 11 Syaaban bersamaan 17 April 2019 dan disertai pelajar-pelajar dari beberapa buah Pusat Tingkatan Enam dari seluruh negara. ●



Aktiviti Kemasyarakatan Membersihkan Rumah Mangsa Kebakaran

Pada 29 Rejab 1440 bersamaan 5 April 2019, seramai 20 orang ahli sukarelawan Yayasan Sultan Haji Hassanal Bolkiah di bawah Projek Bantuan Kecemasan dan Kemasyarakatan bersama-sama Majlis Perundingan Kampung Pad Nunok telah mengadakan aktiviti kemasyarakatan

bergotong-royong membersihkan rumah sebuah keluarga yang terlibat dalam kejadian kebakaran. Rumah tersebut dimiliki oleh Yang Mulia Awang Haji Musa bin Haji Metusin bertempat di No. 1216, Kampung Pad Nunok, Jalan Lamunin, Tutong.

Hadir sama menyertai aktiviti kemasyarakatan tersebut ialah Yang Mulia Awang Haji Taib bin Haji Jaludin, Ketua Kampung Pad Nunok dan Yang Mulia Awang Haji Alimas bin Haji Mohd. Ali, Pegawai Penyelaras Sukarelawan Yayasan Sultan Haji Hassanal Bolkiah. ●





DANA Hargai Sokongan dan Sumbangan Ikhlas Para Dermawan

Usaha Dana Pengiran Muda Mahkota Al-Muhtadee Billah untuk Anak-anak Yatim (DANA) dalam melaksanakan pelbagai program bagi membantu mempertingkatkan kesejahteraan hidup anak-anak yatim di Negara Brunei Darussalam terus mendapat sokongan daripada para dermawan. DANA sangat menghargai usaha yang berterusan daripada semua pihak dalam menganjurkan program dan aktiviti bagi mendapatkan kutipan untuk disumbangkan kepada anak-anak yatim yang berdaftar di Sekretariat DANA.

Sumbangan daripada Butra Heidelberg Cement (BHC) Brunei

Sebanyak BND5,500 disumbangkan oleh Butra Heidelberg Cement (BHC) Brunei. Sumbangan tersebut telah disampaikan oleh Duli Yang Teramat Mulia Paduka Seri Pengiran Muda Mahkota Pengiran Muda Haji Al-Muhtadee Billah ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Menteri Kanan di Jabatan Perdana Menteri semasa Majlis Penyampaian Hadiah Kejohanan Golf Butra Heidelberg Cement (BHC) Brunei

2019 pada 21 Syaaban 1440 bersamaan 27 April 2019 di The Empire Hotel & Country Club, Jerudong. Sumbangan tersebut diterima oleh Yang Mulia Dato Paduka Eddie bin Dato Paduka Haji Sunny, Ketua Pegawai Eksekutif DANA.

Perbadanan Tabung Amanah Islam Brunei (TAIB) dan anak-anak syarikat Perbadanan TAIB

DANA menerima sumbangan berjumlah BND130,000 daripada Perbadanan Tabung Amanah Islam Brunei (TAIB) dan anak-anak syarikat Perbadanan TAIB.



Daripada jumlah tersebut, sebanyak BND100,000 adalah sumbangan daripada Perbadanan TAIB, iaitu sumbangan bagi caruman dua bulan (Mei dan Jun 2019) Pelan Takaful Siswa bagi Anak-anak Yatim untuk semua anak-anak yatim yang berdaftar dengan Sekretariat DANA. Sebanyak BND20,000 disumbangkan oleh Insurans Islam TAIB Holdings Sdn Bhd, Takaful Keluarga Brunei Sdn Bhd dan Takaful Brunei Am, iaitu sumbangan tahunan daripada syarikat berkenaan.

Darussalam Holdings Sendirian Berhad pula menyumbangkan sebanyak BND10,000 yang juga merupakan sumbangan tahunan syarikat berkenaan. Sementara itu, pegawai dan kakitangan Insurans Islam TAIB Holdings Sendirian Berhad juga memberikan sumbangan sebanyak BND650.

Kesemua sumbangan tersebut disampaikan oleh Yang Berhormat Pehin Datu Lailaraja Mejai Jeneral (B) Dato Paduka Seri Haji Awang Halbi bin Haji Mohd. Yussof, Menteri Pertahanan Kedua selaku Penggerusi Lembaga Pengarah Perbadanan TAIB kepada Yang Mulia Dato Paduka Awang Eddie bin Dato Paduka Haji Sunny, Ketua Pegawai Eksekutif DANA. Sumbangan tersebut disampaikan semasa

Majlis Penyampaian Sumbangan dan Majlis Berbuka Puasa anjuran Perbadanan TAIB dan anak-anak syarikat Perbadanan TAIB di Masjid Ar-Rahman, Kampung Tanjung Bunut pada 20 Ramadhan 1440 bersamaan 25 Mei 2019.

Sumbangan daripada PAR Food and Beverage Sdn Bhd dan The Coffee Bean & Tea Leaf Brunei



Wadah دادگ • Aktiviti DANA

Syarikat PAR Food and Beverage Sdn Bhd dan The Coffee Bean & Tea Leaf Brunei menyumbangkan sebanyak BND3,000. Sumbangan tersebut merupakan hasil kutipan daripada jualan tempat minuman keluaran terhad The Coffee Bean & Tea Leaf Brunei sempena Sambutan Jubli Emas Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam Menaiki Takhta pada Oktober 2018.

Sumbangan tersebut disampaikan oleh Yang Amat Mulia Pengiran Anak Abdul Mun'im bin Pengiran Anak Haji Tahiruddin, Pengarah Urusan PAR Food and Beverage Sdn Bhd dan Yang Mulia Awang Khairul Nidzam bin Haji Abu Bakar, Pengurus Am The Coffee Bean & Tea Leaf Brunei kepada Yang Mulia Awang Samsudin bin Haji Puasa, wakil daripada Sekretariat DANA. Penyampaian sumbangan diadakan semasa Majlis Berbuka Puasa bersama anak-anak yatim daripada DANA bersama penjaga mereka yang diadakan di The Coffee Bean & Tea Leaf Brunei cawangan Supa Save Mata-Mata pada 23 Ramadan 1440 bersamaan 28 Mei 2019.

Sumbangan daripada Ahli Fu Zhou Shiyyi Association (Brunei) dan Fu Zhou Youth Committee

Seramai 58 orang ahli Persatuan Fu Zhou Shiyyi (Brunei) dan Fu Zhou Youth Committee memberikan sumbangan yang keseluruhannya berjumlah BND54,188. Kesemua sumbangan tersebut diterima oleh Yang Berhormat Pehin Datu Lailaraja Mejar Jeneral (B) Dato Paduka Seri Haji Awang Halbi bin Haji Mohd. Yussof, Menteri Pertahanan Kedua selaku Pengerusi Lembaga Pemegang Amanah DANA. Sumbangan disampaikan semasa Majlis Penyampaian Sumbangan kepada DANA pada 29 Ramadan 1440 bersamaan 3 Jun 2019 di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan.



Sumbangan daripada Pasar Raya Al-Noor

Pasar Raya Al-Noor memberikan sumbangan sebanyak BND1,000 sempena pembukaan rasmi pasar raya tersebut pada 22 Syaaban 1440 bersamaan 28 April 2019. Sumbangan disampaikan oleh Yang Berhormat Pengiran Haji Mohamed bin Pengiran Haji Osman @ Othman selaku tetamu kehormat Majlis Pembukaan Rasmi Pasar Raya Al-Noor kepada Yang Mulia Awang Haji Puasa bin Haji Jumat, Penolong Pengarah Urusan Yayasan Sultan Haji Hassanal Bolkiah selaku wakil Ketua Pegawai Eksekutif DANA.

Sumbangan daripada Syarikat Takaful Brunei Darussalam Sdn Bhd

Sumbangan berjumlah BND3,947.95 yang disampaikan oleh Syarikat Takaful Brunei Darussalam Sdn Bhd dan anak-anak syarikatnya merupakan sumbangan daripada pegawai dan kakitangan syarikat berkenaan. Sumbangan disampaikan oleh Yang Mulia Dato Seri Setia Awang Haji Abdul Aziz bin Orang Kaya Maharaja Lela Haji Yussof, Setiausaha Tetap Kementerian Hal Ehwal Ugama selaku Ahli Lembaga Pengarah Syarikat Takaful Brunei Darussalam kepada Yang Mulia Awang Haji Puasa bin Haji Jumat, Penolong





Pengarah Urusan Yayasan Sultan Haji Hassanal Bolkiah selaku wakil Ketua Pegawai Eksekutif DANA. Penyampaian sumbangan diadakan semasa Majlis Khatam Al-Quran dan Berbuka Puasa anjuran syarikat berkenaan di Masjid Pengiran Muda Abdul Malik Kampung Kapok, Muara pada 22 Ramadan 1440 bersamaan 27 Mei 2019.

Sumbangan daripada Syarikat Brunei National Petroleum Sdn Bhd

Sebanyak BND2,020 disumbangkan oleh Syarikat Brunei National Petroleum Sdn Bhd. Sumbangan tersebut ialah hasil kutipan bagi program '*Charity Lunch*' yang dikendalikan oleh pegawai dan kakitangan Syarikat Brunei National Petroleum Sdn Bhd. Sumbangan disampaikan oleh Yang Mulia Tuan Haydn I.Furlonge, Ketua Pegawai Eksekutif Syarikat Brunei National Petroleum Sdn Bhd kepada Yang Mulia Dato Paduka Eddie bin Dato Paduka Haji Sunny, Ketua Pegawai Eksekutif DANA di Pejabat Syarikat Brunei National Petroleum Sdn Bhd, Kompleks Yayasan Sultan Haji Hassanal Bolkiah, Bandar Seri Begawan pada 15 Ramadan 1440 bersamaan 20 Mei 2019.



Sumbangan daripada Syarikat Atha Sdn Bhd

Syarikat Atha Sdn Bhd menyampaikan sumbangan sebanyak BND724.50. Sumbangan tersebut merupakan sebahagian daripada kutipan Program Jualan Amal Biryani Ramadan yang dianjurkan oleh Wafa Hotel & Apartment milik Syarikat Atha Sdn Bhd. Sumbangan disampaikan oleh Yang Mulia Datin Hajah Norhayati binti Pehin Orang Kaya Shahbandar Dato Seri Setia Haji Awang Mohd Nawawi, Pengarah Urusan Syarikat Atha Sdn Bhd kepada Yang Mulia Dato Paduka Eddie bin Dato Paduka Haji Sunny, Ketua Pegawai Eksekutif DANA. Sumbangan disampaikan semasa Majlis Berbuka Puasa anjuran syarikat berkenaan di Wafa Hotel & Apartment, Annajat Complex, Kampung Mata-Mata pada 19 Ramadan 1440 bersamaan 24 Mei 2019. ●





Perlawanan Persahabatan *Paintball*

Badan Kebajikan Pekerja (BKP) Yayasan Sultan Haji Hassanal Bolkiah telah menganjurkan perlawanan persahabatan *paintball* antara rumah-rumah sukan BKP Yayasan pada 22 Syaaban 1440 bersamaan 28 April 2019 bertempat di Royal Brunei Technical Services Paintball Arena, Jerudong. Perlawanan tersebut dikendalikan gabungan Bahagian Sukan dan Bahagian Kebajikan dan Sosial BKP Yayasan.

Perlawanan persahabatan *paintball* adalah sebagai salah satu program riadah dan *team building* yang dihasratkan untuk mengeratkan tali silaturahim dalam kalangan ahli-ahli BKP Yayasan.

Pasukan Rumah Laila Setia 'A' tampil juara, manakala Pasukan Laila Setia 'B' mendapat tempat kedua dan diikuti Pasukan Indera Pahlawan 'B' di tempat ketiga. ●

Perlawanan disertai seramai 64 orang peserta dan dibahagikan kepada lapan pasukan mengikut rumah-rumah sukan BKP Yayasan. Setiap rumah diwakili oleh dua pasukan 'A' dan 'B'.



Program Amal Ramadan 2019



Sekolah Menengah Yayasan Sultan Haji Hassanal Bolkiah dengan kerjasama Sekolah Rendah Yayasan telah mengadakan Program Amal Ramadan bagi membantu para pelajar daripada keluarga kurang berkemampuan.

Program tersebut merupakan aktiviti pendekatan masyarakat yang memberikan pendedahan kepada para pelajar untuk melakukan perkara-perkara berkebajikan seperti bersedekah serta melahirkan rasa bertanggungjawab dan empati dalam kalangan pelajar-pelajar sekolah di samping memberi kesedaran adanya golongan yang memerlukan bantuan. Program juga bertujuan untuk membantu meringankan beban hidup keluarga kurang berkemampuan dalam menyediakan keperluan di

bulan Ramadan dan sebagai persediaan menyambut Hari Raya Aidilfitri.

Melalui program tersebut, para pelajar telah dapat mengumpulkan sejumlah wang dan beberapa barang keperluan untuk disumbangkan kepada mereka yang memerlukan.

Seramai 25 orang pelajar daripada keluarga kurang berkemampuan dari Sekolah Sukan, Sekolah Menengah Sultan Sharif Ali, Sekolah Menengah Awang Semaun, Sekolah Menengah Sayyidina Umar Al-Khattab dan Sekolah Menengah Sayyidina Abu Bakar telah dikenalpasti bagi menerima sumbangan melalui Program Amal Ramadan. Selain itu, seramai sepuluh orang pelajar Sekolah Menengah Yayasan yang

menerima dermasiswa daripada Yayasan juga menerima sumbangan tersebut. Sumbangan yang diberikan berbentuk makanan dan keperluan dapur seperti beras, minyak, tepung, gula, makanan dalam tin dan kuih-muih serta barang-barang keperluan bagi menyambut Hari Raya Aidilfitri.

Penyampaian sumbangan Program Amal Ramadan telah diadakan pada 15 Ramadan 1440 bersamaan 21 Mei 2019 di Dewan Serba Guna, Sekolah Yayasan Sultan Haji Hassanal Bolkiah. Sumbangan disampaikan oleh Pengetua Sekolah Menengah Yayasan, Yang Mulia Madam Chong Li Chen selaku Pengerusi Program Amal Ramadan. ●

K-Dream Night, Malam Budaya Korea



Lebih 200 orang pelajar daripada sepuluh Kelab Kebudayaan Korea (KKC) di Negara Brunei Darussalam termasuk Kelab Kebudayaan Korea Sekolah Menengah Yayasan Sultan Haji Hassanal Bolkiah menyertai acara K-Dream Night.

K-Dream Night yang dianjurkan oleh Kedutaan Republik Korea di Negara Brunei Darussalam telah diadakan pada 9 Syawal 1440 bersamaan 14 Jun 2019 di

The Rizqun International Hotel, Gadong.

Ahli-ahli Kelab Kebudayaan Korea dari Sekolah-sekolah Menengah dan Institut Pengajian Tinggi di seluruh negara mempamerkan persembahan pentas (tradisional dan moden) seperti nyanyian lagu-lagu Korea, persembahan tarian Korea dan seni permainan Korea. Kelab budaya Korea dari Universiti Brunei Darussalam telah dipilih sebagai kelab

terbaik pada tahun ini.

Tahun ini menandakan ulang tahun keenam sejak K-Dream Night diadakan pada tahun 2014. Acara K-Dream Night diadakan untuk memberi peluang kepada ahli-ahli kelab untuk berkongsi aktiviti dan pengalaman, serta untuk menjalankan rangkaian antara Ahli Kelab Kebudayaan Korea di Negara Brunei Darussalam. ●



Lawatan ke UBD Spectacle 2019

Seramai 16 orang pelajar Sekolah Menengah Yayasan yang terdiri daripada pelajar-pelajar Tahun 10 Arts 1, Tahun 10 Arts 2 dan Tahun 11 Arts telah membuat lawatan ke UBD Spectacle 2019: Beyond, Art & Design Graduation Exhibition yang diadakan di Galeri Seni, Dewan Canselor,

Universiti Brunei Darussalam. UBD Spectacle 2019 merupakan pameran seni tahunan yang dianjurkan oleh mahasiswa tahun akhir Program Seni dan Teknologi Kreatif (ACT). Pada tahun 2019, terdapat 33 karya seni dipamerkan.

Para pelajar Sekolah Menengah Yayasan berpeluang mengajukan soalan kepada mahasiswa program ACT yang juga berkongsi pengalaman mereka dan seterusnya memberi nasihat dalam menghasilkan karya seni. Lawatan tersebut memberikan pengalaman dan peluang yang bermakna kepada para pelajar berinteraksi dengan 'seniman' yang setentunya memberikan inspirasi kepada mereka. ●



Minggu Bahasa Inggeris



Minggu mata pelajaran Bahasa Inggeris merupakan salah satu kegiatan sekolah untuk memperkaya dan mempelbagaikan kaedah pembelajaran pelajar. Sekolah Menengah Yayasan Sultan Haji Hassanal Bolkiah menganjurkan Minggu Bahasa Inggeris selama tiga hari bermula pada 9 Syaaban 1440 bersamaan 15 April 2019.

Pelaksanaan Minggu Bahasa Inggeris bertujuan untuk membantu para pelajar melibatkan diri dalam proses pembelajaran dan penguasaan bahasa

Inggeris secara tidak formal. Ia juga dihasrat untuk melahirkan pelajar yang dapat menguasai bahasa Inggeris dengan cekap dan membimbing pelajar supaya dapat menggunakan bahasa Inggeris dalam pertuturan dan penulisan dengan cara yang kreatif.

Sebagai usaha untuk membangkitkan semangat kompetitif dan membawa kepada penglibatan aktif pelajar, Jabatan Pelajaran Bahasa Inggeris Sekolah Menengah Yayasan buat julung kalinya pada tahun ini memperkenalkan

House Challenge Trophy. Semua pelajar dibahagikan kepada empat pasukan mewakili rumah masing-masing untuk bertanding mengumpul mata bagi merebut trofi berkenaan.

Beberapa aktiviti dipertandingkan seperti *Spelling Bee*, *Word Play* dan *Human Scrabble*. Aktiviti *Spelling Bee* dibukakan kepada pelajar menengah bawah dan dimenangi oleh Rumah Tutong. Pertandingan *Word Play* dibukakan kepada pelajar menengah atas dan dimenangi oleh Rumah Brunei dan Muara.

Pertandingan *Human Scrabble* buat pertama kalinya diperkenalkan di Sekolah Yayasan. Setiap ahli rumah mewakili huruf abjad yang telah ditentukan dan ketua pasukan masing-masing menyusun huruf-huruf mengikut perkataan-perkataan yang diumumkan. Pertandingan *Human Scrabble* dimenangi oleh Rumah Tutong.

Secara keseluruhan, Rumah Tutong dinobatkan sebagai juara dengan memperolehi markah tertinggi, iaitu sebanyak 160 mata dan memegang *House Challenge Trophy*. ●



Minggu Aktiviti Sains



Dengan membawakan tema '*Love Science*', Sekolah Yayasan Sultan Haji Hasanal Bolkiah telah menganjurkan Minggu Aktiviti Sains selama seminggu bermula 11 Syawal 1440 bersamaan 15 Jun 2019. Minggu Aktiviti Sains berjalan serentak bagi ketiga-tiga buah sekolah, iaitu Taman Asuhan Kanak-Kanak (TASKA) Yayasan, Sekolah Rendah Yayasan dan Sekolah Menengah Yayasan.

Minggu Aktiviti Sains bertujuan untuk memupuk minat para pelajar mengenai mata pelajaran sains dan menjadikan mata pelajaran sains suatu yang menyeronokkan. Pelbagai aktiviti dijalankan sepanjang minggu untuk disertai oleh semua pelajar seperti *Win A Science Quiz and Adopt A Plant Campaign*, *Mike Bunny Farm Exhibition*, *Build Your Own House of Cards Competition*, *Science Twister Challenge*, *Jenga Competition* dan *Making Soap Using Recycled Cooking Oil Showcase*.

Pelancaran Minggu Aktiviti Sains disertai oleh semua pelajar dan guru TASKA, Sekolah Rendah dan Sekolah Menengah

serta para ibu bapa dengan kempen penanaman pokok bunga dan sayuran, iaitu kempen *Adopt A Plant*. Tumbuhan yang disenaraikan untuk dipelihara dan dijaga oleh warga sekolah dalam kempen tersebut ialah bunga berwarna-warni seperti Lavender, Pukul Sembilan dan sayur seperti cili padi dan tomato.

Mike Bunny Farm turut dijemput untuk mempamerkan koleksi arnab seperti *Netherland Dwarf*, *Anggora Full Face*, *Mini Lion Head* dan *Black Otter* yang ditempatkan di Makmal Sains Sekolah Menengah.

Pertandingan *Build Your Own House of Cards* dimenangi oleh Muhammad Sufi bin Haji Jofri dari Tahun 10 Sains, manakala pertandingan *Science Twister Challenge* dimenangi oleh Mohammad Hazim Muzdahir bin Haji Hairul Mohammad Daud dari Tahun 11 Arts. Awangku Mohammad Safiy Amir Darwisy bin Pengiran Mohamad Amirrizal dari Tahun 7 Beta pula menjuarai pertandingan *Jenga Competition*.

Minggu Aktiviti Sains ditutup dengan pameran pembuatan sabun menggunakan minyak masak kitar semula oleh pelajar Tahun 10. Dalam aktiviti ini, empat kumpulan pelajar bersaing membuat persembahan pembuatan sabun (*making soap using recycled cooking oil showcase*). ●





Bengkel Motivasi Pelajar PSR

Seramai 138 orang pelajar Tahun 6 Sekolah Rendah Yayasan Sultan Haji Hassanal Bolkiah yang bakal menduduki Peperiksaan Penilaian Sekolah Rendah (PSR) pada tahun ini menghadiri Bengkel Pelajar Cemerlang Calon PSR 2019 yang disampaikan oleh Persatuan Kemajuan Insan (KESAN). Bengkel diadakan pada 7 Syaaban 1440 bersamaan 13 April 2019, di Dewan Sekolah Rendah Yayasan.

Bengkel tersebut merupakan pendekatan yang berkesan dalam menyampaikan

maklumat bermakna kepada para pelajar supaya mereka dapat mengimbangi pencapaian dalam bidang akademik dan juga aktiviti ko-kurikulum. Taklimat mengenai kepentingan merancang masa dan tatacara mengulangkaji pelajaran juga diberikan.

Sesi taklimat turut diselitkan dengan pelbagai aktiviti permainan yang memberikan pengajaran kepada pelajar-pelajar terhadap kepentingan mendengar dan mematuhi arahan-arahan yang

diberikan semasa peperiksaan.

Bengkel antara lain juga bertujuan bagi memberikan motivasi dan kesedaran kepada para pelajar mengenai kepentingan pendidikan dan seterusnya menanamkan sikap positif, meningkatkan keyakinan diri serta memberikan peluang kepada mereka untuk meneroka potensi diri masing-masing. ●





Acara Sukan Kids Athletic

Acara sukan tahunan Kids Athletic diadakan pada 28 Syaaban 1440 bersamaan 4 April 2019 di Dewan Serbaguna, Sekolah Yayasan Sultan Haji Hassanal Bolkiah. Acara dirasmikan oleh Setiausaha Persatuan Ibu Bapa Guru (PIBG) Sekolah Yayasan, Yang Mulia Datin Dayang Hajah Masni binti Haji Ali.

Seramai 368 orang pelajar Tahun 1 dan 2 Sekolah Rendah Yayasan berentap bagi merebut pingat emas, perak dan

gangsa dalam acara sukan tahunan tersebut. Sebanyak enam aktiviti sukan dipertandingkan, iaitu Skuad Lompat Jauh, Lemparan Sasaran (*Target Throw*), Larian Berhalangan, Relay (*Balancing Ball on Spoon*) dan Bean Bag Throw. Para pelajar dibahagikan mengikut pasukan rumah masing-masing, iaitu Rumah Biru (Daerah Brunei dan Muara), Rumah Kuning (Daerah Tutong), Rumah Merah (Daerah Belait) dan Rumah Ungu (Daerah Temburong). Turut hadir memberi

sokongan kepada para pelajar ialah para ibu bapa.

Acara sukan tersebut bertujuan untuk meningkatkan kecerdasan fizikal dan mental, di samping mencungkil bakat para pelajar dalam bidang sukan. Penyertaan para pelajar dalam acara sukan juga dapat meningkatkan semangat kerjasama dalam kumpulan dan meningkatkan keyakinan diri para pelajar. ●



Bulan Akademik MIB dan IRK

Bulan Akademik Melayu Islam Beraja (MIB) dan Pengetahuan Ugama Islam (IRK) di Sekolah Rendah Yayasan diadakan sepanjang bulan April dan diisi dengan pelbagai aktiviti.

Acara penutup Bulan Akademik MIB dan IRK diadakan pada 24 Syaaban 1440 bersamaan 30 April 2019, di Sekolah Rendah Yayasan. Acara dimeriahkan

dengan persembahan drama pentas bertajuk "Lumut Lunting dan Pilong-pilongan" yang dipentaskan semula oleh guru-guru Jabatan MIB Sekolah Rendah Yayasan.

Para pelajar juga berpeluang menyertai pertandingan menapih sinjang bagi pelajar rendah atas Tahun 4 dan 5 serta pertandingan menambat dastar bagi rendah bawah Tahun 1 hingga 3.

Bulan Akademik MIB dan IRK bertujuan untuk memupuk minat para pelajar terhadap mata pelajaran Melayu Islam Beraja (MIB) dan Pengetahuan Ugama Islam (IRK) yang merupakan mata pelajaran penting terutama dalam mendidik pelajar menjawai falsafah negara Melayu Islam Beraja. ●



Majlis Sambutan Israk Mikraj

Sambutan Israk Mikraj merupakan salah satu aktiviti tahunan Taman Asuhan Kanak-Kanak (TASKA) Yayasan Sultan Haji Hassanal Bolkiah bagi memperkenalkan sambutan hari-hari kebesaran Islam di Negara Brunei Darussalam kepada kanak-kanak TASKA.

Seramai 559 orang kanak-kanak TASKA Yayasan Sultan Haji Hassanal Bolkiah

menghadiri Majlis Sambutan Israk Mikraj TASKA pada 14 Syaaban 1440 bersamaan 20 April 2019.

Acara dimulakan dengan bacaan surah Al-Fatihah dan diikuti dengan penyampaian cerita mengenai peristiwa Israk Mikraj yang disampaikan oleh Yang Mulia Ustazah Noryasimah diikuti dengan demonstrasi mengambil wudhu.

Aktiviti yang dilaksanakan sebagai perisian acara sambutan tersebut disesuaikan dengan mata pelajaran yang diajarkan. Antara tujuan kegiatan ini adalah untuk meningkatkan kefahaman kanak-kanak TASKA terhadap apa yang disampaikan dalam bilik darjah. ●



Sambutan Hari Raya Aidilfitri TASKA

Taman Asuhan Kanak-kanak Yayasan Sultan Haji Hassanal Bolkiah meraikan sambutan Hari Raya Aidilfitri pada 24 Syawal 1440 bersamaan 29 Jun 2019 di Dewan TASKA dalam suasana yang meriah. Kanak-kanak yang hadir mengenakan pakaian baju Melayu berwarna-warni menambahkan lagi ceria suasana berhari raya.

Majlis diserikan lagi dengan persembahan nyanyian Tausyeh Solatun Bissalaam dan Tarian Tualang Tiga yang dipersembahkan kanak-kanak TASKA.

Majlis Sambutan Hari Raya Aidilfitri merupakan acara tahunan TASKA bertujuan untuk memberikan pendedahan kepada kanak-kanak

mengenai majlis-majlis kebesaran Islam. Selain itu, acara tersebut juga bertujuan untuk memberikan pengalaman yang menyeronokkan kepada kanak-kanak untuk menikmati suasana berhari raya bersama keluarga besar TASKA dan saling bersalam-salaman dan bermaaf-maafan antara satu sama lain. ●



Acara Sukan Ria FUNTASKATIC TASKA 2019

Taman Asuhan Kanak-kanak Yayasan Sultan Haji Hassanal Bolkiah telah mengadakan Acara Sukan Ria FUNTASKATIC TASKA 2019 pada 28 Syaaban 1440 bersamaan 4 Mei 2019. Acara sukan ria merupakan kegiatan tahunan TASKA.

Hadir selaku tetamu kehormat sekali gus merasmikan acara sukan ria tersebut

ialah Yang Mulia Dr. Haji Zulaidi bin Haji Abdul Latif, Timbalan Setiausaha Tetap (Profesional), Kementerian Kesihatan.

Acara Sukan Ria FUNTASKATIC TASKA 2019 diisikan dengan sesi senamrobik. Sebahagian daripada murid TASKA mengenakan pakaian Karakter Katun, memperaga karakter terdapat daripada buku cerita yang mereka baca di sekolah.

Acara seterusnya diikuti dengan acara *walkathon* yang disertai kanak-kanak TASKA serta para ibu bapa masing-masing dalam suasana menyeronokkan.

Tujuan utama acara sukan ini adalah untuk memperkenalkan dan mempromosi cara hidup sihat melalui aktiviti sukan dan riadah di samping mengeratkan hubungan tali silaturahim antara ibu bapa, penjaga dan guru-guru. ●



VISI

Masyarakat Mandiri

MISI

Menguruskan Amal Jariah
Kebawah Duli Yang Maha Mulia
Paduka Seri Baginda Sultan Haji Hassanal Bolkiah
Mu'izzaddin Waddaulah
dan Ahli-Ahli Keluarga Baginda
secara profesional, cekap dan
penuh dedikasi.

Wadah diterbitkan oleh
Yayasan Sultan Haji Hassanal Bolkiah
Jalan Perdana Menteri
Bandar Seri Begawan BA1511
Negara Brunei Darussalam

Telefon
223 4085 | 223 4087 | 223 4088

Faksimili
223 4082

Laman Web
www.yshhb.org.bn

Instagram
yshhb_official

Facebook
Yayasan Sultan Haji Hassanal Bolkiah